

**RADIO SCIENCE SERIAL  
SUSTAINABLE DEVELOPMENT  
LIFE MUST GO ON-LIFE JAI THAKI BOLE LAGE  
INTERACTIVE EPISODE  
EPISODE-09**

Hello saathi khan, kokai bhai khan aro kheti kurea manu khan, aji Prog: te amar khan sustainable agriculture Nagaland te kinika hoi ase, etu kotha bari kuri bo. Amar naam tu Senti Longchar, ami Horticulture Officer ase, Horticulture Deptt: para ase, amar logot saathi bhal ekta ahi kena ase, Stephen Dukru, Agriculture Officer, Agriculture Deptt: para. Aji ami duijon Sustainable Agriculture upor te kotha kuri bo.

Senti- Achha, Stephen, poila world war 11 te, kheti bari te, eman botli hoi she nah, etu ki karone ase bhabi as ho, apunar bi.

Stephen- Etu kheti kurea laga nium tu, World war 11 piche te bishi botli hoi she. Etu kile mane, etu piche te, noutun technology, noutun nium khan bishi ahi she. Etu number ekta ase. Aro, kheti kurea te machines khan bi bishi cholai jai she. Aro third factor ekta tu, dawai khan mati bhal kuri kena, mane, mati bhal hobole fertilizer bishi cholai jai she.

Senti- Toh... etu puka khan mora laga pesticides khan bi hobo toh nah?

Stephen - Hoi, hoi, etu khan bi sop cholai kena, aro etu upor te Govt: khan bi, population bi bishi hoi ase, kha loa khan bi bishi bana bole lage enika hoi kena, tar khan policy khan bi etu farmer, kheti kurea manu khan ke tar khan kinika modot kuri bo koi kena, policy khan bi formulate kurea para.....

Senti- Oh hoi, hoi.... Government Policy 1960 phele naki....? Green Revolution laga Prog: bi ekta thaki she naki?

Stephen- Hoi, 1960s piche te, movement ekta, kha loa bishi bana bo koi kena, etu suru hoi she.

Senti- Hoi, hoi kha loa banai kena bahar te bi patha bo enika bi thaki she naki?

Stephen- Hoi, etu laga Prog: para ki- ki kuri kena, a-ge te koi dea nishina, technology noutun khan cholai, machines khan, dawai

khan aro Govt: Policy bi kheti kurea manu khan ke favor kuri kena, kha- loa bishi u-la bole pari she. Enika hoi kena, nijor khabole bi bishi thaka ekela nahoi kena, bahar country ke bi patha bole pari she, tar khan.

Senti- Hoi, etu sustainable agriculture ami hunea hisap te tu hoile, etu.... gaas khan aro jaanwar khan etu khan ke bachai rakhi bole laga enika ekta ase naki?

Stephen- Hoi, etu, sustainable agriculture idea tu kinika hoi kena ulai she koi le tu, a-ge te, technology chola khan, machines dawai, noutun niium ki- ki chola te tu, tar khan sop kha loa bishi ula bo, etu focus tu etu he thaki she. Tar khan kuri thaka time te, etu mati beya hoi ja bo, paani letra hoi ja bo, hawa letra hoi jabo, nahoi le bi gaas khan nathaka hoi ja bo, etu laga bhabana eku thaka nai. Etu nimite, kha loa bishi ula time te, dawai bishi chola time te, mati bishi beya hoi jai she toh. Enika dawai chola time te, paani bi letra hoi jai she.

Senti- Aro, mati paani te puka bhal hobole khan bi mori jai toh nah?

Stephen- Hoi, dawai cholai le etu khan bi mori jabo, aro ami khan kha loa bishi ula bo koa time te, ami khan laga resources khan bi bishi cholai toh. Upor te paani sufficient nahoa karone, mati-underground water khan bi ulai kena paani khan bi komti hoi jai she toh.

Senti- Toh... apuni koa hisap te tu, sustainable agriculture etu khan tu hoile, ami khan ahi bole laga bachha laga bachha khan karone bi ami khan hawa paani khan tu bachai rakhi bole lage, etu he ase nah?

Stephen- Umm... ami khan etu... age te koa laga niium te, future bachha khan karone bhal nahoi jai bo etu janea karne, ami khan kinika hoi kena ami khan kha loa lagea laga pai le bi, ami khan kinika hoi kena ami khan laga hawa paani khan sop bhal hoi kena bachha khan ke rakhi di bo, etu laga concept ulai jai she. Etu karne, Sustainable Agriculture, etu kheti kura laga bishi importance di kena, etea kuri ase.

Senti- Umm... aro sabi toh, ami khan, United Nations khan para bi, etu khan hawa paani khan bacha bole nahoi le bi prithibi te manu ase, tar khan karone, ekdom healthy, amar khan laga gao thik rakhi bole, tar khan goals ki- ki banai kena ase koi she nah?

Stephen- Umm.. Ami khan etu, future bachha khan karone rakhi bole laga tu, khali kha loa ekela nahoi, ami khan alak- alak, etu mati, hawa paani nahoi le bi, ami khan ki- ki ase sop ami khan human resource- manu logote ki- ki ase, nahoi le bi, prithibi te ki- ki ase sop etu, amar khan beya nakuri kena, bachha khan ke rakhi di bole importance bishi di ase toh. Etu karone United Nations tu, etu all round development nimite 17 goals rakhi kena ase.

Senti- Oh etu, 17 goals te, Goal No: 1 te ami janea tak te, etu No Poverty manu khan ekdom dhukea nathaki bole laga enika ekta ase koi she nah?

Stephen- Hoi, etu ami ekbar ene Goals khan ki- ki ase, ekbar highlight kuri bo. Hoi le bi out of the 17 Goals te, ami khan duita goals, goal No: 1 aro Goal No: 2 he, Agriculture, kheti kura laga etu para he, achieve kuri bole pari bo karne, etu te he, alop kotha kuri bo. Hoile bi, dusra khan bi ami alop highlight kuri bo. Goal No: 1 tu dhukea nathaki bole, duk- suk nathaki bole, aro Goal No: 2 tu, zero hunger tu bhuk nalagi bole. Mane, kha loa nathaki kena nathiki bole. Goal No: 3 tu gao bhal, gao bhal mane, gao kinika hoi kena bhal rakhi bo etu goal ekta ase. Aro school jai kena bhal para pu-ra likha hobole karne.

Senti- Hoi, aji kali Govt: para free education bi di thake nah?

Stephen- Hoi, hoi, etu pu-ra likhea tu, bishi importance kile di ase koi le tu, pu-ra likhea janea para tu, dusra khan bi sop bhal hoi jabo toh. Aro No: 5 tu Gender equality, ami khan society te, kaun ba tu maiki khan alop komti, mota khan u-cha, enika ki- ki kuri le bi maiki hoi le bi mota hoi le bi eki opportunity, facility khan di bole etu bi ekta goal ase. Ami khan society te, mota khan ke bishi importance di thaki hoi le bi, etu hata bole lage, etu mentality nah. Aro Goal No: 6 tu, Clean Water & Sanitation, paani tu bishi important ase toh. Paani para amar khan bimar- simar khan bi

bhal hobole beya hobole bi bishi ase. Etu... duniya te manu bishi sapha paani khabole paani bi napai kena bi ase toh nah! Etu, bi goal ekta. Aro Goal No: 7 tu hoi le tu, Affordable & Clean Energy. Ami khan light khan hoi le bi, kha loa bana bole khuri khan jula hoi le bi, nahoi le bi machine chola bole, petrol diesel khan hoi le bi, etu energy ula laga bi ami khan laga environment letra nakuri bole lage. No: 8 Goal te, Decent Work & Economic Growth etu kam kurea jaga te, bhal thaki bole lage, aro amar khan tate para economy uthi bo aro pabo lage. Aro industry innovation & infrastructure etu bi....

Senti- Hoi, hoi etu industry innovation laga te, ami khan nijor, local manu khan para ki- ki khan banai nah! etu khan nishina aro, ami khan khoi, Phek te Sakraba te elaichi khan suka bole, tar khan nijor bana laga enika khan bi promote kuri bole lage. Mane u-thai di bole lage.

Stephen- Hoi. Etu innovation infrastructure ki ghor banai le bi, nahoi le bi noutun idea ki-ki banai le bi ami khan laga environment ami khan laga hawa paani ki- ki beya naho bo lage. Negative impact nathaki bole lage. Aro Goal No; 10 te Reduced Inequality, ami khan kaun nu ba bishi dhunea thaki bo, kaun nu ba bishi dhuki thaki bo nah! Etu khan bi balance kuri bole lagi bo. Aro sustainable cities aro communities, ami khan aji kali cities te manu khan bishi ahi jai she, toh....ahi kena ami khan kinika hoi kena bhal para thaki kena next generation khan bi etu thaki bole lage etu bhabana ase. Aro responsible consumption aro production, ami khan kha loa chola laga etu khan bi ami khan ene khushi- khushi kuri kena waste nakuri bole lage, beya nakuri bole lage. Etu Climate Action.....

Senti- Hoi, Stephen, etu climate action laga bi ami huni she. Aji kali din bi achanak- achanak gorom hoi jai aro paani khan puri thake aro kitea ba paani bi ekdom napuri jai enika toh.... etu khan laga te bi ami khan bhabana kuri bole lagi ase. Aro koa nishina, etu goal ekta aro bishi important tu, ami khan paani niche te, ki-ki thake, ocean seas aro nodi ki- ki te, etu te maas khan, kekra

khan nahoi le bi, jaanwar paani laga thake, etu khan bi ami khan bacha bole lagi ase. Aro mati te, paani bitor te he nahoi, mati upor te bi jaanwar khan thake, etu khan bi amar khan bacha bole lagi ase. Etu khan karone bi bhabi bo lage. Nahoi le tu, ami khan sabi toh, ahi bole laga generation, ami khan laga bachha khan laga bachha khan etu paani bitor te thakea laga jaanwar khan bi nadi khea hoi ja bo ami khan husear kurea nai koile. Aro mati upor te thakea laga, jaanwar khan bi nadi khi jabo.

Stephen- Etu ami khan bi, ene sai le tu, ami khan bachha time te, chirea khan, jaanwar ki- ki khan bishi dikhea khan aji kali bishi nadikhea hoi jai she toh. Etu bi important ekta hobo.

Senti- Aro yate 16 Goal te, Peace, Justice & Strong Institution mane sop manu khushi para, sop manu eki thaki bole laga enika laga bhabana bi ase dae. Aro last te, etu laga goal te, ami khan sop mili kena, alak- alak country hoi le bi, alak - alak jati hoi le bi, sop manu mili kena etu ami khan laga duniya tu bacha bo lage, enika United Nations laga Goal ase dae.

Stephen- Etu, Goals khan tu, bishi bhal ase, ami khan alak -alak jaga para, alak- alak method para achieve kuri bole pare. Hoi le bi ami khan etea No: 1 aro 2 goal te, kheti bari para ami khan achieve kuri bole para laga duita tu hoi le tu, dhukea nathaki bole ekta aro bhuk nalagi bole, sop manu kha loa thik pabole karone. Etu duita ase. No poverty, dhukea hata bole laga tu, kinika ase, kha loa nathaka nahoi le bi poisa nathaka ekela he, dhukea koi nah..... tate etu upor te bi dusra bi ase.

Senti- Etu.... hoi saathi bhabana hisap te tu hoile, khali bhuk lagea enika laga nahoi, hoile bi ami khan laga pu-ra likha laga school ja laga, nahoi le bi ami khan family te, bachha khan ke morom nakurea laga nahoi le bi maiki khan ke, morom nakurea laga enika kisim alak thake poverty koa tu nah!

Stephen- Umm... Achha! ami khan normally bhabana tu hoi le, dhukea ase koi le tu, poisa nathaka, kha loa nathaka, etu he generally, etu he bhabana ahea toh. Hoi le bi, etu ekela nahoi koi kena ami khan jani ase. Etu, pu-ra likhea kuri bole naparea laga

etu bi dhukea ekta ase. Aro kha bole nathaka bi ekta ase. Society te manu para hisap nakuri kena, dusra manu khan logote eki nahoa nishina thaka bi etu bi dhukhi ekta ase. Aro ami khan nijor life te, etu kuri bole mon ase, ami enika thaki bole mon ase, koi kena decision ami khan nijor lobe naparea laga bi ekta dhukhi ase koi kena jani ase. Problem, etu khan tu...ah... ami khan kheti bari para bi kuri bole parea laga bi bishi ase. Aro No:2 tu....

Senti- Hoi, Goal No:2 zero hunger, etu bi hata bo karne, etu ami khan Nagaland te bi, IFAD mane- International Fund For Agriculture Development koi kena etu bi Prog: ekta chuli ase. Tate....ami khan Agriculture aro Allied Deptt: khan aro etu, kha loa tenga phool, aro sobji khan, etu khan aro jaanwar khan, ene morgi khan hoi le bi, guru khan hoi le bi ene saguli khan hoi le bi, enika eki logote te pali kena, amar khan laga kheti te, pali bole laga Prog: ase.

Stephen- Etu bishi bhal Prog: ekta ase. Ami khan Sustainable Agriculture Development laga goal nahoi le bi, bhabana tu ki ase, etu alop kotha koi di bi nah.

Senti- Sustainable Agriculture te, etu Economic profitability, mane ami khan laga laap laga etu khan bi sai ase. Hoi le bi etu laap tu ami khan kiman pai ase, etu ami khan hawa, mati para he pai ase toh nah. Toh.... ami khan etu laap pa tu hoi le....hawa, mati paani ke bi beya nakuri bole laga, ami khan sosta kuri bole lage toh nah.

Stephen- Umm... Ami khan mane.... hawa- paani, mati nahoi le bi ami khan laga resources, etu khan ami khan guardian nishina, malik nishina sai kena thaki bole lage. Ami khan care taker, ami khan etu bhal para sai kena piche te bachha khan ke dibole karne rakhi bole lage etu hisap te ase.

Senti- Hoi etu koa nishina, Sustainable Agriculture Development ami khan main bhabana tu, ami khan aji din te ki pa ase, etu ahi bo din te bi, etu same pabo lage. A-ge te, ami duijon koa nishina, etu, ami khan bachha time te tu, jaanwar khan chirea khan dikhi thaki she, hoile bi u-tu jaanwar khan chirea khan aji kali nadi khea

hoi jai she nah! Toh.... etu sustainable development koa ke bhabana nakurea para hoi she. Toh, ami khan aji kali ami khan etu sustainable development bhabana kuri bole lage.

Stephen- Achha! etu.... Sustainable Agriculture, Sustainable Kheti, kuri bole karne, ami khan tate ki- ki kuri bole lage.

Senti- Etu, ami khan hawa paani para ki dishe, ami khan bi tar khan ke, wapas di bo lage. Gaas khan kati dea ami khan nah! Toh... etu gaas ekta kati dishe koile, aro bi gaas ekta- duita lagai dibole lage. Nahoi le tu, ami khan gaas tu, kati thaki she koi le tu, piche te ami khan eku bi napai jabo. Khuri jula bole bi napa bo, aro hawa paani bi gorom hoi jabo, enika kuri kena bishi duk hoi jabo ami khan.

Stephen- Etu mane, ami khan kheti kurea time te, etu gaas khan para, mati te tar laga vitamins, tar laga nutrients thaka khan, moul khan u-lai dea. Toh.... ami khan etu khan bi wapas di bo lage. Mane, ami khan moul khan banai kena mati te di bo, nahoi le bi kinika hoi kena, tai laga moul tu, aro wapas pari bo etu kuri bo lage.

Senti- Hoi, ami khan tate, etu crop rotation enika bi koi nah! Agriculture te, khali ami khan, khali gaas ekta he nalagai kena sobji ekta he nalagai kena mila- mili lagai le tu, puka para bi ahi kena nakha bo, aro ami khan leguminous crop koi, etu beans khan nishina nah! Etu beans nishina khan tu, mati te lagai le, mati tu bishi moul hoi jai enika khan ase.

Stephen- Aro dusra point ekta tu hoile, bio diversity, mane- sustainable agriculture te, ami khan jaanwar hoile bi gaas khan hoi le bi, alak- alak variety pali bole lage.

Senti- hoi, etu tu hosa ase, kile koile ami khan sabi toh, ekta gaas he lagai she koile tu, puka para khai di she koi le tu, khotom he hoi jai. Toh... ami khan botli kuri kena alak alak lagai she koi le tu, puka para bi kha bole tu, chance napai.

Stephen- Variety ekta ekela lagai she koi le tu, etu puka khan nahoi le bi, bimari khan laga bi etu specific thake toh. Mane, ekta ekela hoi le tu, sop ek bar para he khai di bo. Hoi le bi ami khan

alak alak lagai di le tu, tar khan ekta khai le bi dusra ke khai di bole napare.

Senti- Sabi aro ami khan animal welfare koi kena bi ami khan bhabana kuri thake nah! Toh... etu jaanwar khan ke ami khan kinika morom kuri bole lage, jaanwar khan ke kinika sabo lage, toh... etu sustainable development laga te tu, ami khan jaanwar khan ke morom kuri bole lage tar khan kinika bira bole mon ase bira bole di bi enika khan ase. Toh... apunar bi kinika bhabe?

Stephen- Etu jaanwar khan bi, ami khan pareta tak tu, tar khan natural environment dibole pareta tak di bo lage. Hoi le bi, etu, ami khan khushi chari dea laga bi nahoi. Khushi chari di le tu, koa nishina kheti khan bi beya kuri di bo. Hoi le bi tai khan kinika rakhi le tar khan gao bhal hobo, aro tar ke kha loa bi thik di bo lage.

Senti- Mane, ekta time te chari bo, ekta time te, bandi bo enika nah?

Stephen- Hoi enika bi, aro ami khan dawai bi alak alak thake toh nah aji kali bi nah? Etu dawai di kena tar khan phot dagor hobole karone, enika khan bi dea toh nah? Enika khan di kena bi, ami khan manu khan karone bhal naho bo. Jaanwar khan karone bi bhal nahoi. Etu karone, tar khan ke thik thak pali bo karone, dawai khan bi nadi le he bhal. Kheti kurea tu hoi le tu, khali, gaas ekela nahoi kena, jaanwar eki logote te palea tu, tai duijon laap ase toh duita te bi. Mane, jaanwar pali le tu, tar laga paikhana khan, tar laga pisap khan kheti te chola bole pare. Aro kheti te para, tar khan kha loa sop ula bo par. Etu, karone cycle ekta nishina ase. Etu para, kheti kurea manu khan tu, duita bi kuri bole encourage kuri bole lage.

Senti- Maas khan palea te bi, tate...morgi khan laga paikhana khan bi bhal ase koi toh nah?

Stephen- Umm... especially haas khan. Haas aro maas eki logote palea tu, bishi laap ase. Kile mane, haas tu paani te bishi thake...Aro tar laga paikhana tu, paani te di le tu, maas karone bhal ase.



Senti- Ami sustainable farmer koi kena huni thake ho. Sustainable farmer tu, apunar bi alop kobo pari bo?

Stephen- Sustainable Farmer, mane... etu kheti kura manu tu, nijor kura laga para, nijor kheti para tai lagea khan tai laga needs khan...

Senti- Mane, tar tu modot.... Govt: para bi modot namange nah?

Stephen- Hoi, hoi, etu kut te bi depend nakuri kena, nijor ki lagi ase, nijor kheti para ulai kena aro tai nijor bachha khan ke pali bole laga bi nahoi le bi, kha bole ba nijor ki lagi ase, sop ula bole para laga etu khan sustainable farmer enika bi hobo aro, main sustainable agriculture laga objective ekta tu hoi le tu, sop manu ke enika nijor -nijor pali bole laga bana bole bi ekta ase.

Senti- Hoi... Nagaland te bi, ase, Sustainable Farmer koa tu nah, ami bi dikhi thake, tar khan koi thake, 'ami tu hoi le, eku Deptt: laga subsidy bi namange aro lagea bi nalage, hoi le bi, ami ki kuri ase, etu tu, apuni khan bi ahi kena kini kena khabi' enika khan koi thake. Achha Stephen nah! aji kali Organic Farming ki ase aro sustainable farming etea ami duijon koi thaka, etu ki ase koi di bi nah.

Stephen- Achha, etu organic farming koa tu hoi le tu, dawai khan nacho la bole, ami khan etu fertilizer thake, pesticides, puka morai di bole nahoi le bi, habi mora laga herbicides khan nahoi le bi ami khan GMO koi kena Genetically Modified Organism enika khan nacho lai, organic te. Ami khan, organic farming te hoi le tu, focus main tu, kha loa u-la laga te chemical free hobo lage. Chemical nathaki bole lage dawai khan nathaki bole lage. Etu, sustainable agriculture aro organic farming laga difference tu ki ase koi le tu, etu organic farming bi sustainable farming he ase dae. Hoile bi sustainable farming te tu hoi le tu, dawai khan bi ekta hisap te, chola bole bi pare, hoi le bi etu chola laga tu, ami khan koa nishina, resources- mati, hawa paani etu khan beya nakuri bole lage. Etu needs hisap te chola bole lage, balance rakhi bole lage. Hoi le bi organic te tu, etu khan ekdom nachola bole lage. Sustainable tu, dagor- area te sai. Hoi le bi organic te tu,

kaun tu crop kuri ase, nahoi le bi kaun tu area te kuri ase, etu te he focus tu alop bishi dea. Achha! etea ami khan presently Nagaland te bi Sustainable Agriculture Development nimate activity- kam khan kaun nu ba jai ase etu bi huni ase, apunar alop ko bi nah.

Senti- Hoi Nagaland te bi NEPED koi kena Canadian Project ekta chuli ase. Tar khan etea tu third phase te ase. Aro tar khan Agriculture phele bishi bhal kam kurea tu.... etu alder based jhum cultivation te, jhum kheti te lagai kena bishi bhal chuli thaki she.

Stephen- Alder gaas tu hoi le Nagaland nimate bishi bhal ase. Kile mane, ami khan sukhan kheti bishi kure. Etu Alder gaas laga speciality ekta tu tar laga roots tu nitrogen fix kuri bo. Aro etu nitrogen tu, one of the most important nutrient etu gaas khan vitamin mati para lagea laga main ekta, etu karone mati tu, bhal kuri di bo joldi.

Senti- Moi khan 2015 saal te, Sustainable Development upor te dagor seminar ekta thaki she. India para manu khan ahi she, ami khan Nagaland tu hill toh... etu kinika develop kuri bo etu khan bi programme kuri kena jai she. Toh... ami khan Nagaland te tu, bishi wala tu paani para duk pai, toh paani para kinika hobo le lage koi le tu, ami khan nijor- nijor kheti te paani jama kurea laga tu, enika khan bana bole lage, aro ami khan sobji khan te paani khan na de koi le, sobji khan bi bhal nahoi. Etu karone, paani bishi important ase koi kena discussion hoi she. Aro ami khan conservation of indigenous crop koi, indigenous crop mane, ami khan laga nijor laga bacha bo lage.

Stephen- Achha! etea sustainable agriculture nimate bishi discuss kuri she. Hoi le, Nagaland, etea ami khan kheti kurea manu khan nahoi le bi manu khan karone kaun nu ba points suggestions thaki le koi di bi nah.

Senti- Ami ekela nahoi, apunar bi koi di bi. Ami ekta mon te kobole mon tu... amar Naga manu khan specially youth khan nah! tar khan ekdom pu-ra likha ase koi, aro tar khan kam napai koi, toh... tar khan kheti bari kam kuri le tu, bishi laap pabo. Aro koa

nishina ami khan sorom nakha bo lage kheti te jable. Ami khan gaas laga bole sorom nakha bole lage, ami khan mati- paani bacha bole sorom nakha bole lage. Ami khan kitea sorom nakhai kena bhal kam kuri bo, toh, ji hoi le bi ahi bole laga generation, bachha laga bachha khan tu hoi le ekdom bhal para thaki bole pari bo. Apuni bi enika bhabana thaki bo hola?

Stephen- Ami khan Naga manu khan laga nium, nahoi le bi, bhabana sai le tu, kheti kura manu khan tu hoi le pu-ra likha napara manu khan kheti kuri bole lage enika nishina mon ekta ase. Aro, etea sai le tu, kheti kura manu bishi wala tu bosti te he pu-ra likha natha ka manu khan ase toh. Ami bi poila bachha time te ami laga experience ekta... ami amma baba ami ke koi thaka ekta tu hoi le, pu-ri bi bhal para puri bole lage, apuni puri bole napari le apuni kheti kuri bo, ami khan nishina kheti kuri bole ase koi thake. Toh... ami khan dagor hoi kena, ami khan laga bhabana tu hoi le, kheti kurea tu, pu-ra likha naparea khan enika bhabana thaka para, etea tak hoi le bi, ami khan youth khan hoi le bi, kam napai le bi, kheti kuri bole pari le bi kheti tu, ami khan laga kam nahoi nishina enika bhabana thaka para, ami suggest bishi kuri bole mon ekta tu, ami khan kheti bari tu, bhal hoi kena nahoi le bi, profitable, nahoi le bi sustainable, bishi produce kuri bole, a-ge jable koi le tu, pu-ra likha khan ahi bole lage.

Senti- Hoi, koa nishina etu sustainable agriculture development tu, ami khan sop milai kena kuri bole lage, aro koa nishina agriculture tu, khali sobji khan kura laga bi nahoi, tate, ami khan maas khan jaanwar khan bi pali bole pare.